


DITEMBANGANA DYÀ MAKOLÈ

 Njila Yèndè's kayèèna kwondola kumana, kí mmwómò anyi? Mukalenge mulenga be! Mùshindù mwinè wùdìbi byà kalolo bwà kuMweyemena's wè. Mémè ndi ànu mutwishìbwè ne nudi bapicìle mu cikondo cyà dicyònkómoka dilòòlò edi. Nènku ndi mwenzè ànu ngùnzulula ciibi aci mu katanci kakesè emu ki mémè kutèèleja mwanèètù wa bakàji Gertie wimba musambu wà kale awu wà ne: *Tungunukà Nè Kukwàta Bikolè, Anu Bwa Dìbà Dikuàbo Dimwè Cyanààna*, cimvùlwije kaèkèleeziyà kàànyi kakesè aku, pàvwàku pabwìpì menemene ne mémè kuumuka musangu awu bwà kubwela mu mudimu wà mu madimi a bwambi. Ndi mutàngile mpindyewu cìdi cifùnd'eci ne "Kèbaayi Nzambi Dyàmbedi" mwaba ewu bitàngilàngàne ne dikunji dyà kale edi, Ndi mvùluka ne Sammy Davidson wàkacifùnda ne mùkubu kaaba kàka kùkaadi bidimu bitwè ku makùmi àbìdi ne bitaanu, ku luseke lukwàbò ndi ngeela meeji ne cìdi cyamba ne: "Neùpicishilè Cyendèlèlè Penyi? Elàngànà Meeji!" Nènku ànu mwab'ewu pàvwa wa—wa "Mukàji Wa Ku Ciinà Cyà Mâyì," ne, "Danyèlè Mu Bwinà Bwà Ntambwe." Kaa, ekelekèle! Bintu byàbúngi mbyenzèke kacya ànu piinè apu.

² Ànu lwà pa dìbà itaanu mu mappingaja emu mvwa mupetè dibiikila dyà lùkàsàlùkàsà divwà dyùmukila mu ntantà wa wìpacila kilòmèètà makùmi àtaanu, anyi asambombo lwà mu ditùnga edi, dyà mukàji kampàndà ùpùnga ne lufù, mwinè awu mulundà wà mushinga mukolè, mamwèndè wa Georgie Carter. Nènku mvwa mumanyè ne kùvwa bambi bààbúngi kaaba aka bàvwà mwa kushààla bakwàte too ne pàngààkaalukilà. Edith pèndè, ùvwa ùsaama bibi be. Nènku patùvwà kuntwaku apu, Mukalenge Nzambi kumataYè mu cyalu, nènku Mwanèètù wa bakàji Carter ukaadi kule ne difwà. Pa nàнку, pa nàнку tudi ne kusàkidila bwà cyòci aci.

³ Nènku mpindyewu dìbà dyà mudimu wà mèèsà à Mukalenge dikaadi dikùmbana, ngeela meeji ne ndwà pa dìbà dikùmi ne ibìdi piikalàbo ne cyà kuàfila. Ndìbà kaayi dinùdi basungùle bwà kuàfila? [Mwanèètù Neville udi wamba ne: "Dìbà kanà dyònsò, kubangila mpindyewu dìbà kanà dyònsò too ne pa dìbà dikùmi ne dimwè ne tusunsa makùmi àsàtù."—Muf.] Ànu dìbà kanà dyònsò ditùdi. . . Mbanganyì bàdi ne cyà kwangata mèèsà à Mukalenge dilòòlò edi, tùmònààyibi byanza byènù. Abi's, kaa, abi's mbilenga bilayà. Eyo, ndi muswè kwamba ànu dìyi dimwè anyi àbìdi cyanààna. Pàmwàpa nènてekè dìbà dyànyi dyà ku dibòko mwab'ewu munda mwà tusunsa tutwè ku dikùmi, dikùmi ne tùtaanu, netùbange mèèsà à Mukalenge. Mpindyewu, nudi baMunangè anyi? [Disangisha didi dyamba ne: "Amen."—Muf.]

Amen. Ne ndi mumanyè ne nudi bapicile mu cikondo cyà dicyònkomoka, kí mmwòmò anyi?

4 Èè, ewu ní kí m’Mwanèètù Thomas Kidd, ne Mwanèètù wa bakàji Kidd, bafùmine kule ku Ohio kwàka. Ndi ngeela meeji ne bàkaavwa babàjuulè kuulu. Kaa, abi’s mbímpè, ndi ntèkemena ne bìdi pa mukàbà wà mèyi ne nèmbipetè. Nudi bamanyè’s, bóbò kabèèna bàlekelakù to. Badi ànu ne matùkù makesè mwinshì mwà bidimu lukàmà, kàdi—kàdi’s ki cidi cindamàku ne mwoyi mukolè, mpa kumòna bantu bàà mùshindù awu. Elàayibi meeji, mémè nkàadi muntu mukùlakàji, kàdi kumpalà kwà mémè kulediibwa bóbò bàkaavwa bàyiisha Èvànjeeliyò. Kàdi mpidyewu nyewu nkàadi muntu mukùlakàji, kàdi bóbò, piikalàbi ne kabèèna mwà kupàtuka kwela dīyi dikolè to, bàdi bàngata ànu cisanji cyà dikwàta naaci mikàbà yà mèyi ne bàya ku lùpitaadi ne ku lùpitaadi, ku nzùbu ne ku nzùbu, bènda bàyiisha Èvànjeeliyò. Abi’s mbilenga byà dikèma. Amen. Cyà bushùwà ndi ne disànkà menemene bwàbò bóbò ne bwà bònsò bàdi ne myoyi yizùka mu masangisha aa mwaba ewu.

5 Mpindyewu, vùlukàayi ne, netùcimanyishè, bu Mukalenge mwà kwanyisha, pàdi ànu ne èkèleeziyà wàjiki, cidibo bàmba ne cidi mwà kwenzeka pabwipi ne ditùkù dyà dikùmi dyà ngondo mwibìdi, mona’s, tudi, bu Mukalenge mwà kwanyisha, tudi baswè kwangatakù matùkù òwò makesè mwandamukùlù anyi dikùmi, anyi pàmwàpa mbingu yibìdi, pa *Bitampi Muwandamutekète* byà mu Bwàkabuulwibwà abi. Nènkù netùtuminè bàna bètù beenyi bàà mu nyùngulukilu emu twartà, bàà mwètù emu aba, ne kubàmanyisha díbà dyàbùngi kumpalà bwà ne bóbò bapetè meeji à kulwa, èè, ncyà bushùwà ne tudi ne disànkà dyà kwikalakù neenù mwab’ewu. Nènkù pàmwàpa Mukalenge neàtupèèshe dikwàbò dileeja dyà patòòkè dyà Bwikadi Bwèndè bu mwàkenzàYe musangu wà ndekeelu patwàkajikijà *Bikondo Muwandamutekète Byà Èkèleeziyà*.

6 Nwènkù baswè bwà kusambidilakù muntu kampànda, mòna’s, nwamvùlukaayikù mémè misangu yònsò, bwalu mémè ki muntu udi menemene naadi dijinga. Mpindyewu, ndi ndyùm vwa bundù ndambu, bwà kwangata tusunsa dikùmi, dikùmi ne tùtaanu etu kaaba aka, bwà kwamba kaacintu kakesè kumpalà kwà twètù kubanga, kàdi twinyikàayikù mitù yètù bwà katanci kakesè cyanààna.

7 Mukalenge Yesù, kaa, mvità yàdyàkujika dīngà ditùkù, ne kakwàkwikala kàbìdi mubèèdi wa kusambidila to, ne kakwàkwikala kàbìdi bàngènzàmpèèkààtù bwà kunyingalalabò to. Kàdi, Taatù, pàdi ditùkù edi cididi eci apa, twènzèku mudimu patùcidi ne bukènke bwà kukwàcilamù mudimu apa, bwalu díbà dilwalwà diikalà muntu nànsha umwe kàyi mwà kukwàta mudimu to. Mpindyewu, ànu bwà katanci kakesè cyanààna, Mukalenge, ndi mufwànyine kudyùm vwa bibi bu mémè nciyi mucyenza to, kwoya cidimu eci nciyi mwambèku ndambù wa

mèyi. Nkwàcishèku, Taatù, mündi ndòmba, bwà ngààmònakù mwà kwamba cintu kampàndà cidi cifwànyine kukùna bukitù munda mwà mwoyi wà cisàmbà Cyèbè, bwà twamòna mwà kuumuka kaaba aka dilòòlò edi paanyimà pàà twètù bamanè kudyà mèèsà à Mukalenge, ne tudi tujingulula ne mu mèèsà à Mukalenge mùdi dikàndà. Izàlèlèlà wakangata kòòmuniyò bwà musangu wa kumpàla mu Èjiipitù mwàmwa, kwendàbò bidimu makùmi ànaayi bisàbaata byàbò kabìyi bisùnsùke anyi bilàmbà byàbò kabìyi bipelùke to. Nènku, pa bantu miliyò yìbìdi, kakùvwa muntu nànsha umwe ne butekètè munkaci mwàbò pààkapàtukàbo mu cipèèlà to. Mukalenge, tùvùlukèku cyòci aci dilòòlò edi patùdi tuseemena ku dîbà dinène edi apa. Mu Dìnà dyà Yesù mmutùdi tulòmba emu. Amen.

⁸ Byòbì bikèngela bwà mèmè kwamba cyena-bwalu cìmvwà mufùnde ne mpàmvwà ne cyà kubangilapù mu mapingaja emu, tudi bafwànyine kwikala apa pa dîbà ìtaanu wa dindà. [Muntu kampàndà ùdi wàmba ne: “Abi nebìikalè bîmpè.”—Muf.] Kàdi ndi muswè kubala ànu Dìyi dimwè cyanààna dyà mu . . . [“Abi nebìikalè bîmpè.”] Twasàkidilaayi. Mu Efesò, nshapità mwifò, mvensà wa 12, ne ànu bwà katanci kakesè cyanààna mpindyewu, bwà bukitù.

Bwalu katwèna tulwangana ne munyìnnyi ne mashi to, kàdi nne mamfùmù, ne makolè, ne . . . bakòòkeshi bàà . . . midimà bàà buloba ebu, ne nyumà mibì mu myaba mitùmbùke.

⁹ “Lwonji lwà nyumà mu myaba mitùmbùke.” Nènku ndi njinga kupàtula mu cyòci aci dyumvwija dikesè dyà tusunsa dikùmi anyi dikùmi ne tùtaanu, anyi cyena-bwalu, èyo, mündi muswè kuciinyika ne: *Ditembangana Dyà Makolè*. Ditembangana dyà makolè nditeeta dyà makàndà. Nènku twètù, mwaba wutùdi ne . . . kuteeta makàndà. Kale wàwa tuvwa ne . . . Ba-Indiens bàvwa ne ciibidilu cyà kuteemesha mudilu, ne bàvwa bàtèèka bantu bùngì kampànda ku ewu ntengu wa mwonji, ne bùngì kampànda ku ewu ntengu, nènku manàyi a—dikòkangana ku mwonji, ditembangana dyà makàndà, bàvwa bàkòka kasùmbù kàà bàvwa bapuyile aku bàbapicishila mu mudilu amu. Nènku mpindyewu tudi bamanye ne kùdi bintu byàbùngì, ne tudi bafwànyine kushiindamijilapù eci munda mwà tusunsa ndambù, bwà—bwà ditembangana dyà makolè, kàdi ndi muswè kwakula mu tusunsa etu lùkàsàlùkàsà pa ditembangana dyà makolè ditàmbe bunènè didiku, mbwena kwamba ne, pankaci pàà Èkèleeziyà ne Sàtaanà. Dikàndà dinènè dyà Sàtaanà adi. Nènku tudi baswè kwakula bwà dikàndà dinènè dyà Nzambi mu Èkèleeziyà Wendè.

¹⁰ Mpindyewu, ditembangana dinènè dyà makolè edi didi dyènzeka kùkaadi bidimu byàbùngì. Dyàkabangila mu Dyulu, ne Sàtaanà wàkiipaciibwa e kwediibwayè pa buloba, ne dîbà adi kulwayè mwena lukunà wa cisàmbà cyà Nzambi. Nènku,

kuumukila ànu apu, ùdi ùkwàta mudimu ne dikàndà dyèndè ne màyelè èndè ònsò bwà kuteeta kukòkela cisàmbà cyà Nzambi mu midilu, anyì, mu midilu yèndè.

¹¹ Kàdi twètù tudi bamanyè ne Nganyi udi ne bukolè butàmbe, Nzambi ngudi naabù. Nènku Nzambi, pàakapèeshàYe cisàmbà Cyèndè Cintu citàmbe bwímpè civwàYekù mwà kucipèesha bwà kulwishabò naaci Sàtaanà, civwa n'Díyì Dyèndè. Mpindyewu, bu mùdibi ne Díyì n'Nzambi, nènku udi ne dikàndà kutàmbe Nzambi nganyi? Pa nàнку, Díyì didi Nzambi, ne Díyì didi dílwa dyètù dikànda. Nzambi mu Èkèleeziyà, ùdi ùlwa Dikànda dyèndè bwà kukòkela Sataanà mu midilu yèndè sungangana yivwàye muteemèshè. Ne dikòkangana adi nditùngùnùke. Mpindyewu, Yesù wàkamba, mu Maakò 16 ne: “Mu Dîna Dyànyì bóbò nebiipatè baadémons.”

¹² Mpindyewu, ndi mumanyè ne aci's ndíyì dyà kale dyà bantu, anyì, kùtu díyì dyà kale ditù. . .kàdi kî ndyà kale menemene to, dyòdi diinè. Bantu kabàtu bìtabuuja baadémons mu ditùkù edi to. Kàdi cyà dyanza, bwà ku wanyì mmwènenenu, ncyà kumanya mwena lukunà webè. Nènku—nènku kumanya mwena lukunà webè, ne kudiibidija bwà ditembangana dyà makolè diwàpetà pawàtwilanganà nendè, bwalu wadyàkutwilangana nendè. Nènku kumumanya, kumanya èndè. . .kumanya mùdi dikàndà dyèndè, ne pashiishè kudiibidija bwà ditembangana dyà makolè edi pawàtwilanganà nendè cyà bushùwà. Bwalu cintu cimwè cilelèlè cidiku ncyà ne, newùtwilangana nendè, nàнку udìbidijè bwà ditembangana dyà makolè adi.

¹³ Mpindyewu kudiibidija bwà ditembangana dyà makolè kùdi ànu mùdi mutuucyanganyi wa mànkomò amu. Mwena lukunà wendè—wendè wikalayè mwà kutwilangana nendè pambèlù pàapa mu ditembangana dyà makolè amu, bwà kulwangana, mulwanganyi wa mvità mwímpè menemene pa ciibidilu ùtu ùmanya ne ùlonga mulwishì wendè. Ùdi ùlonga bisuusù byèndè byà bikolè, ùdi ùmanya mwaba wùtùye ùlwangeena, ní ùtu winamina kumpàlà, wèyemena paanyimà, ùlwangana ne dyàbalùme anyì ne dyàbakàji. Ùdi ùlonga byònsò ebi. Ne pashiishe piikalàye mulwanganyi mwímpè, wa meeji matwè, ùdi ùdikèbela mukwèndè wa didiibidija nendè wíkala mwà kulwangana ànu mùtù mulwishì wendè ùlwangana amu, bwalu yèyè neàmanyè bisuusù byèndè byònsò byà bikolè pààfikayè pa kaaba aku.

¹⁴ Nènku ndi ngeela meeji ne aci ncintu címpè menemene bwà beena Kilistò kwenzabò. Ncyà bushùwà. Nènku mpindyewu wèwè muswè kubanga didiibidija, bangà ne Yone 3.16, Kanungu kàà Ngòlò aku. Bangà buludi ne cyòci aci, nènku aci necikwelè mu cyalu. Ne pashiishe dìbidijè bwà—bwà mbata yà ditònkwelangana naayi panshi, bwalu nebikengelè bwà ùkwatè naayi mudimu. Aci muntu yònsò mmumanyè. Bikèngela ùdìbidijè bwà kutuuta mwena lukunà webè awu. Ne misangu

yônsò, Nzambi ùtu ùkwàta mudimu ne Dìyì Dyèndè. Tudi ne cyà kuvùluka ne Nzambi ùtu ùkwàta mudimu ne Dìyì Dyèndè bwà kucimuna mwena lukunà Wendè. Bu Nzambi mufwànyine kwela meeji anyi kupèèsha cisàmbà Cyèndè cintu kampàndà cyà citàmbe bwimpè bwà kucimuna naaci mwena lukunà, nùnkù's mMucyènzè. Nènku ànu múnkààdi mwambàmbe ne: "Pàdi Nzambi wàngata dipàngadika, ki dyà ditàmbe bwimpè dídiku. Kabyènakù biMukèngela bwà kushintulula mapàngadika Èndè nànsha." Pa nànkù dipàngadika dyà kumpàlà dyàkapèèsha Nzambi cisàmbà Cyèndè mu budimi bwà Edènà, bwà kulwisha mwena lukunà, cìvwa n'Dìyì Dyèndè. Bàvwa bakolèshìibwe ne Dìyì Dyèndè.

¹⁵ Nènku mpindyewu mwena lukunà neàlongè...màyelè ètù ne Dìyì. Nènku, mpindyewu, Sàtaanà wàkalonga byônsò abi ànu menemene mu mùshindù wà ne, pàakafikàye kùdi Evà, ùvwà ne—màyelè matàmbe bwimpè àvwàye mwà kukwàta naawù mudimu pà yèyè, ne àvwa nkulukakaja lungènyì ne Dìyì. Mpindyewu, kùjingikù bwà kulukakaja lungènyì ne Dìyì dyà Nzambi to. Dítàbùùjè wèwè ànu cyanàànà. Kùteeci bwà kuDyùmvwija to. Kutèeci bwà kudifwànyikijilaDì to. Mpindyewu, kwèna mwà kudifwànyikijila Nzambi to, pa nànkù Nzambi udi Dìyì, nènku Dyòdi ndyenza anu bwà kwitabuuja. Nènku ki Dikàndà dyètù ndyòdi adi, itàbà wèwè ànu Dìyì. Ne muntu yônsò ewu mmumanyè ne dimiinu mu buloba bwà mùshindù mwimpè nedikwamè bilondèshile mùshindù wàdi. Nènku twètù tudi twangata anu Dìyì cyanàànà.

¹⁶ Nènku, mpindyewu, Evà kubangayè kwimana bwà kulukakaja lungènyì, dîba divwàye...wàkamutèèlela Dìyì, ne: "Nzambi mmwambè ne: 'Kabìvwa bikèngela bwà nwènù kukùdya to, bwalu ditùkù dinwàkùdya' ki dyòdi adi ditùdi tufwà."

¹⁷ Kàdi Sataanà kàakabenganganakù nendè pa bìvwàye wàmba abi to. Yèyè wàkamba ne: "Cyà bushùwà, aci ncyà bushùwà." Kàdi yèyè ne: "Udi umòna's, bìdi binùkèngela Bukènkè bupyabùpyà." Cintu kampàndà cyà cishìilàngànekù ndambù ne cìdi Nzambi mwambè. "Nènku nwènù ànu bacyènzè, nenùtambè kwikala ànu ne meeji matwè ndambù. Mèsù ènù neàtabalè."

Kàdi mukàji kwambayè ne: "Èè, Nzambi's mmwambè ne netùfwe."

¹⁸ Yèyè kwamba ne: "Kaa, bushùwà..." Nwamònu's, apa kaayi wáfiki, ànu mu cipidì aci ne: "Bulelèlè menemene kanwàkufwà to." Kàdi Nzambi mmwambè ne neùfwè, ne aci ncikòse bwalu! Nènku aci—aci cyàkakòsa dikòkangana ku mwonji dinènè adi dîba adi, ne cyàkakòkela cisà cijimà cyà bukwàbantu mu lufù, bwalu Evà wàkatèeleja dilukakaja dyà lungènyì divwà dibèngangana ne Dìyì dyà Nzambi adi.

Mpindyewu, mbyà mbundù pàakacyenzàye, kadi's mbimanè kupita. Kàdi mpindyewu tucidi ànu bakolèshiiibwe, ne dinungu adi dyàkalongolodiibwa mu Kilistò Yesù. Aci tudi bamanyè. Nzambi mmutùpèeshe ngabu wetù mutàmbe bwimpè, ànu kweyemena Dìyì Dyèndè cyanààna.

¹⁹ Nudi bamanye's, ne bààbùngì bàdi bàmba leelù ewu ne cintu pàaci ne ndyabùlù kacitukù to. Bàdi bôbò biitabuuja ne cidi ànu meeji cyanààna. Ki cidibo biitabuuja ncyôci aci. Ne kùdi bantu bàdi biitabuuja ne—ne—ne Nyumà Mwimpè mmeeji mimpè, ne dyabùlù mmeeji mabi. Kàdi bu nwènu mwà kumòna, pàdi Bible wàkula bwà Nyumà Mwimpè, Yèyè mmwambè ne: "Pikalà Nyumà Mwimpè Yèyè mulwè." Ne "Yèyè" mmupinganyi muleeji muntu. Nwamònu anyi? Pa nàнку, Yèyè, Yèyè mMupèsonà. Ne dyabùlù mmupèsonà. Ne démons mbapèsonà. Èyowà, ndémons, ne yôyi—yôyi yilwalwa mu mishindù yàbùngì. Kàdi bôbò bàdi bèèla meeji ne mmwènenenu wa cyena-kale.

²⁰ Muntu kampànda ùvwa ùkòkangana naanyi mwab'ewu kwènjì ndambù wa mbingu. Yèyè ne: "Udi mumanyè cyùdi wèwè ewu wenza anyi? Udi ànu utèeka meeji à bantu abu ku ditùma meeji ku cintu kampànda paùdi ubàmbila cintu aci apu. Cidi ànu nshintùlùkilù wa meeji cyanààna."

²¹ Ngàkatwilangana ne cintu cìmwècìmwè aci mu Inde musangu kampànda, pàvwà bantu bàà cijila abu kuntwaku kutwàkapetà, ngeela meeji batèèleji batàmbe bùngì bânkaadiku mèmè ewu mwakùle naabò, mu musumbà wùmwèpelè wà batèèleji biimàne kuulu, wà batwè ku cyàbibìdi cìmwè cyà mùllyò mujimà wà bantu, ne mèmè kucibàkula ku dijingulula mu Nyumà. Nènku bàvwa bàmona Nyumà Mwimpè ùbiikila bantu, ne ùbàbiikidila, lwà mu batèèleji amu, ne wàmba bintu bishiilèshiiilàngàne, ne ùbàkula meeji àbò. Bamfùmù bàà beena Inde ne bantu bàà cijila, bàvwa bàmba ne: "Udi ùbala mu meeji àbò."

²² Pa nàнку katançi kakesè aka anyi, bantu batwè ku bàtaanu anyi bàsambòmbò bamanè kupicila mu mulongo wà babèèdi amu, ki muntu mulùme kampànda mpofo kupicilayèmu. Ne yèyè ùvwa mpofo ànu wetù ewu, ne mèsù èndè matòoke ànu mùdi mutèèlù wànyì ewu emu. Ki mèmè kwamba ne: "Mpindyewu mpofo nyèyè ewu, muntu kanà yònsò ùdi mwà kumòna ne yèyè mmpofo." Ki mèmè ne: "Bu ne mvwa mwà kumwambulwisha mvwa mufwànyine kwenza nàнку, kadi mùshindù wùmwèpelè wùndiku mufwànyine kwenza mmufwànyine kwikala ku dipà kampànda, pàmwàpa kwamba cintu kampànda cidìye mwenzè; nènku aci ncifwànyinekù kufila meeji à ne piikalàbi ne Nzambi mmumanyè cidìye mwenzè, ncyà bushùwà ne mMufwànyine kumanya cidìye ne cyà kwenza." Kì mèmè ne: "Mpindyewu, mu kumutàngila," mèmè ne, "mpindyewu, yèyè mmukuukwidi wa dībà. Yèyè mmufomija kùkaadi bidimu makùmi àbìdi." Nènku, pàakacyàmbà mwandamunyi, civwa cyà bushùwà. Mèmè ne:

“Mmulùmè musèlàngàne. Yèyè. . . mukàjèndè ngwa kanyìkanyì, ne ùdi ne bàna bàà balùmè bàbìdì, umwe ne bidimu bitwè ku mwandamutekète, ne mukwàbo ne bidimu citèèmà.” Aci cìvwa mu cyòci menemene. Mémè kwamba ménà àbò, mu wówò.

²³ Pashìishè mu batèèleji amu, mwaba wùvwà bantu bàsanganyiibwa awu, kubwelakù divwala adi ne: “Mbyà mu meeji, ncintu kampàndà cyà mu mùshindù wà—wà dibala dyà mu meeji àbò.”

²⁴ Dìbà adi mémè kudyàmbidila ne: “Mukalenge, bu Wèwè mwà kunkwàcishakù. Ndi—ndi dijinga ne dikwàcisha Dyèbè, Mukalenge. Bantu aba bàdi bàteeta bwà kutèèka cintu eci mu mulongo wà lubùkù. Kàdi pààbì kì ndwòlò to, ne Wèwè udi mumanyè nànkù, Mukalenge.” Pààbì, ndi mubàpèèsha Mufùndù wàkambà Yesù ne Yèyè kàvwa wènza cintu pàvwà Taatù Kàyì muMulèjè to. Kì pashìishe, dyà nkùdimuka cyàkàbìdì ntàngila muntu awu, mémè kumumòna ànu lwà kuulu aku mu cikèènà-kumòna, mwikàle ne mèsù mîmpè ànu mûndì mémè naawù emu. Mémè kudyàmbidila ne: “Mpindyewu ki dìbà ndyòdi edi.”

²⁵ Mémè kwamba ne: “Muntu ewu mmukuukwidi wa dìbà, mpindyewu, ne mmushààle mpofo.” Ki mémè ne: “Mpindyewu, kùdì. . . Kùdì baakwidi bàà Baamùzùlùmaanyi, ne kùdì ba—baakwidi bàà ba-Sikhs, ba-Jains, ne bàà mùshindù mishìilèshìilàngàne yà ntèndeleeu, beena Buddha. Mpindyewu muntu ewu mmuswè kupetulula lumònù lwèndè. Mpindyewu, nudi bafwànyine kwamba ne yèyè—yèyè ùvwa ùkuukwila cìfùkìibwà pamutù pàà Mufùki. Ndi pàànyì ngiitabuuja nànkù. Kàdi’s ki twètù aba basòmbè kaaba aka dilòòlò edi.” Mémè ne: “Ne tuvwa. . . leelù ewu mvwa mwakidila mu ntempèlu wa ba-Jains mùvwa ntèndeleeu dikùmì ne mwandamutekète mishìilèshìilàngàne yìsanganyiibwa bwà kungeela nkonko, ne yònsò wa kùdìyi ùbèngangana ne Kilistò, yònsò wa kùdìyi!” Ki mémè ne: “Mpindyewu, ne bààbùngì bàà kunùdì bàvwamù. Mpindyewu, piikalàbì ne Kilistò mmupìile mùshindù awu, dìbà adi muntu ewu’s mmuswè kwikala mu bulelèlà, ne ncyà bushùwà ne Nzambì wa bufùki Wakafùka buloba awu neikalè Umwèpelè Udi mwà kumupèèshulula lumònù lwèndè. Aci ncyà lungènyi.” Kì mémè ne: “Mpindyewu, byòbì ne muntu kanà yònsò wa kunùdì, ba-Mùzùlùmaanyi kaaba aka kì ntèndeleeu udi mutàmbe kwikala wa mushinga, bu mwakwidi wa ba-Mùzùlùmaanyi mwà kulwa mwaba ewu ne kumupèèshulula lumònù lwèndè, dìba adi mémè nèndondè ba-Mùzùlùmaanyi, anyì bu mwakwidi wa beena Bouddha mwà kulwa kumupèèshulula lumònù lwèndè. Kàdi Nzambì Wàkamufùka awu, Nzambì, Nzambì wa muntu kampàndà mwaba kampànda, bwalu kùdì ne cyà kwikalakù, katwèna mwà kwikala ne bufùki kakùyì Mufùki kampàndà to. Ne nebikengelè bwà Mufùki kampànda kufùkaYè lumònù mu mèsù aa. Yèyè ùvwa mpofo kùkaavwa

bidimu makùmi àbìdì bifùmìne ku ditàngila dyà ku dîbà, wèla meeji ne mmufwànyine kuya mu Dyulu bu yèyè mwà kucyènzà. Muntu ewu mmucyènzè mu dipanga.” Mémè ne: “Ncinyi cinùdiku nwènù baakwidi bàà Bouddha bafwànyine kwenza? Nudi bafwànyine ànu kushintulula ngeelèlù wendè wa meeji cyanààna. Nudi bafwànyine kwamba ne mmupiile.” Bàtu bàkuukwila bankambwà bààbò bafwè. Ki mémè ne: “Mpindyewu, nudi bafwànyine kwela meeji ne ùvwa, nudi bafwànyine kwamba ne ùvwa mupiile, kàdi cinùdi bafwànyine kwenza ncinyi? Nudi bafwànyine kushintulula ngeelèlù wendè wa meeji.” Ki mémè ne: “Ncinyi cìdiku Mùzùlùmànyì mufwànyine kwenza? Anu kushintulula ngeelèlù wendè wa meeji. Ba-Sikhs, ba-Jains, ne bakwàbò, kushintulula ngeelèlù wabò wa meeji.”

²⁶ Mémè ne: “Tudi ne cintu cimwècimwè aci mu États-Unis. Ba-Méthodistes bônso mbaswè kuvwiija ba-Baptistes bônso bàlwe ba-Méthodistes, ne beena Mpenta mbaswè kwangata ba-Méthodistes bônso ne kubàvwiiija beena Mpenta. Nnshintùlwilù wa meeji. Kàdi kî mbwà aci citùdì twètù twakula to. Tudi twakula bwà Nzambì, Mufùki awu.” Kî mémè ne: “Cyà bushùwà Mufuki awu mmufwànyine kwakula.” Nènku, mpindyewu, ncìvwa mufwànyine kwikala mwambè nàнку bu cikèèna-kùmòna aci kaciyiku to, nànsha byà munyì. Mpindyewu mémè ne: “Mpindyewu, piikalabi ne Kampànda, tùlekelè Yèyè ikalè Nzambì, àlwe kumupèèsha lumònu lwèndè.” Ki mémè ne: “Mpindyewu ndi ngeela mwakwidi anyi Mfùmù kanà yònsò wa beena Inde kadyòmbò, anyi muntu wa cijila anyi ni ncinyi cyònsò cìdici cìfwànyine kwikala aci, àlwe kumupèèsha lumònu lwèndè, nènku mémè nèndondè nkìndì yènù ayi ne, nwakùdimwishi muntu mucìma.” Nènku aci cìvwa musùmbà wa mutàmbe kwikala wà matàmà bu byàtà wùnkààdiku pàànyì muumvwè. Nwamònu anyi? Muntu nànsha umwe kàakacyènzà to.

²⁷ Ki mémè ne: “Cinwàshààdidi bapùwe nàнку ncinyi?” Mémè ne: “Cinwàshààdidi bapùwe, mbwalu kanwèna mwà kucyènzà to, ne nànsha mémè pàànyì ncyèna mwà kucyènzà to. Kàdi Nzambì wa mu Dyulu Wàkabiisha Mwàn'Èndè Yesù Kilistò ku lufù, ùndì mémè ewu musadidi Wendè awu, mmufùme ku dindeejà cikèèna-kumònaà cyà ne muntu ewu neàpetululè lumònu lwèndè.” Nwamònu anyi? Mémè ne: “Mpindyewu, byòbì kabiyi nàнку to, dîba adi nudi mwà kutùma dîyì bwà bàmpàtùle mu Inde emu. Kàdi byòbì nàнку, yònsò wa kunùdi mpwena dibànzà bwà kufila mwoyi wèndè kùdì Yesù Kilistò. Ndi muswè kunùkonkakù, mbanganyì mwaba ewu bàdi baswè kufila mwoyi wènù kùdì Kilistò bu mpofò ewu mwà kupetulula lumònu lwèndè? Nudi numòna baakwidi bèènù's, muntu nànsha umwe kàyikù ùbànda kùneeku to. Bwà cinyi kabàyi bàlwa, piikalàbo banwàmbìle mùdì wabò ntèndeleelelu mwikàle mutàmbe bunènè ne mutàmbe bulenga? Bwà cinyi kakùyikù muntu kampànda

ùlwa bwà kwàmba cintu kampànda?” Muntu nànsha umwe kààkalwa to. Mémè ne: “Dìbà adi nwènú bàdì pààpa bàba, nwènú bamòne mpofo udi mwimàne apa ewu . . .”

²⁸ Ki ngàngàbukà kampànda kulwayè bwà kukenketa mèsù èndè. Kukùpayè mutu, kwamba ne: “Mmpofo.”

²⁹ Ki mémè ne: “Ncyà bushùwà, mmpofo.” Kàdi mémè ne: “Piikalàbi. . . Nènku Nzambi Yèyè mumupèeshùlùle lumònú lwèndè, mbanganyi bàà kunùdì bààsàdilà Yesù Kilistò?” Nènku too ne kule menemene kùmvwà mwà kumòna aku, cyenzè bu mbù mujimà wa byanza bifilke. Mémè kukùdimukila kùdì muntu awu, e kwamba ne: “Mukalenge Yesù, bìmanyiibwè ne Wèwè ki Nzambi.” Muntu awu kumpyàye mu nshingù, ne mwaba awu bàvwa basòmbepù kùdì mulombodi wa cimenga cyà Bombay, kumupyàye mu nshingù, umòna bìmpè ànu mùdì muntu kanà yònsò ewu.

³⁰ Ncinyì aci? S—S’mbukolè ànu bwètù bwà cyà bushùwà ebu! Nzambi ùdì Nzambi, ne Sàtaanà ùdì Sàtaanà! Wèwè kùyì witabuujà démon to. . . Pancivwà mbangilakù, mvwa—mvwa nditutuuta kùdiye ne màbàjà ònsò ditùkù dyònsò. Kùngambidiku ne démon kàtukù to, bwalu mémè ndi mumanyè bìmpè. Bikèngela ndwanganè nendè mvità ditùkù dyònsò. Pa nàнку ndi mumanyè ne kùdì—kùdì démon. Nènku udi ne cyà kwikala mwibidija paùdì utwilangana nendè. Kí mmwibidija mu dilonga dyà nsòmbelu, kí mmwibidija mu dilonga dyà tulaasà to; kàdi mwibidija kùdì Nyumà Mwímpè; bukolè bwà Nzambi mu Dìyì Dyèndè bwà kumwènesha Dyòdì adi. Ikàlà mumanyè mwena lukunà webè. Kaa, ncintu cyà lwonji kaayipu cidìye’s wè!

³¹ Mùshindù mwinè wùmvw’à kujinga kwimanyina apa mpindyewu ne kudyàdijilapù, kwalukila mu Bible mujimà bwà kunùleeja muntu kale wàwa wàkakùngamangana nàaci mpàla ne mpàla. Mùshindù wùvwàbi mu dilwangana dyà mvità ne mulwishì, mwàkadikoleshàbo ku Dìyì dyà Nzambi. Noà wàkapeta dilabula dyàci, ne wàkamanya ne Nzambi ùvwa mumwambile ne mvùla neàlokè. Nènku ditembangana dyà makànda kwenzekadì pankaci pàà maalù à mamanya ne Dìyì dyà Nzambi: Maalu à mamanya àmba ne: “Kabyèna mwà kwenzeka to.” Nzambi kwambaYè ne: “Nebyènzekè.” Amen.

³² Cintu cimwècimwè aci cidikù leelù ewu. Necyènzekè! Cidi cyènzeka bulelèlà! Baadémons bàdikù! Kàdi Yesù wàkabiipata, ne Yèyè wàkapa Èkèleeziyà Wèndè bukòòkeshi bwà kwenza nàнку ne: “Nwipatè baadémons mu Dìná Dyànyì!” Yèyè wàkiipata démons mwandamutekète munda mwà mukàjì kampànda mulenga kumòna dīngà ditùkù. Ki kwambaYè ne: “Pàdi nyumà wa bukooyà ùpàtuka munda mwà muntu, ùdì wèndakana mu myaba myùme, wàlukila pashiishè, ùtwa démons mikwàbò mwandamutekète pàmwè nendè.” Mpindyewu, aci cidi cileeja ne muntu yèyè mukezùdiibwe

ku démons, kùvwa cintu kampànda munda mwèndè cìvwà cipàtùke. Démon kampànda mmupàtùke! Mpindyewu, pàvwà démon mupàtùke apu, Nzambi...cidi cìpèèsha Nzambi mpùngà wa kubwelaYèmu. Pa nàнку, kàdi pàdiye ùpàtuka, lekèlà Nyumà Mwimpè àbwelè. Kùmùsliyi ànu cyanààna to. Wèwè munyingàlale ànu cyanààna ku mpèkaatù yèbè kàdi kutùngùnuka, dìbà adi neùbiipè kutàmba ne dyàmbedi. Kàdi enza ne mwaba wùvwà Sàtaanà musòmbèlè ne mukwàte musangu kampànda awu, ùwùjijè tètè ne Nyumà Mwimpè wa Nzambi, nènku dìbà adi newikalè ne dikànda dyà Díyì dyà Nzambi munda mwèbè, dimwènèshìibwe, ne newipaté baadémons. Ditembangana dyà makànda ki kumònganganadi eku. Makènkè à dilòòlò ki kuteemawù eku. Nyumà Mwimpè wa Nzambi ùdipù.

³³ Nènku mpindyewu nkushààle ànu tusunsa bu—bu túsàtù nàнку awu too ne ku cikondo cìikalà tushibà ne cyà kwediibwa, ne dìbà mundankùlu nedikumbanè. Dìbà adi patùdì tuumuka mu citanda emu apa, bwà kuya ku myaba yètù mishìleshìilàngàne ne ku mbànzà yètù, ne kutwilangana pambèlu, ne kutwilangana ne maalu a pa buloba, katùyi mutùvwà tuya mu bikondo byà kale nànsha. Tùyaayi mu bukolè bwà dibìikà Dyèndè dyà ku lufù. Tùyaayi mu Dìna dyà Yesù Kilistò, biikàle ne dibèndelà dibàndisha muulu, ne diitabuuja mu Díyì Dyèndè, bwà kukwàta mwelè wà mvità wà nseke yibidì musàkisha awu, biikàle ne ngabu ne byà mvità byònsò byà Nzambi, bwà kutwilangana ne mwena lukunà, bwalu ùdi ùtamba kwenda kulwa ne dikànda ne bukolè bwàbùngì ditùkù dyònsò. Pàdi—pàdi mwena lukunà ùbwela byenzè bu musùlù mupaasàlale, Nyumà wa Nzambi ùdi ùjuula dibèndelà ùmukàndameena. Piikalàbi ne tudi bafikè ku ndekeelu wa bintu bitùdì...ne maalu-masokoka a Nzambi mmajikijìbwe kutùdì, tudi bindile dikànda dikwàbò, dikànda dyà dyambwibwa, bwà kutwilangana ne...bukolè butàmbe bubì, dyàmbulà Èkèleeziyà ne kumubweja mu Butùmbi. Tudi ne cyà kubùpeta. Tùtwilanganàayi ne cidimu cyà 63 biikàle ne kadyòmbò, kàà ne, tudi basadidi bàà Nzambi udi ne mwoyi! Ne ànu mùvwà Shadràkà, Meeshàkà ne Abèdènègò bàà kale abu amu, twètù katwàkwaminakù baadémons bàà pa buloba ebu ne kwangatulula cintu cyena bwalu butwàmbi abu nànsha, kàdi tükolèshàayi mvità.

³⁴ Ndi ndyùmvwà dilòòlò edi, patùdì munkaci mwà kutèeleja tushibà atu apu, cintu kampànda bu mwàkadyumvwà Davidi butùkù bwà luuyà bukolè bwà bukwàcisha bwòwà abu pàvwàye mudyàdije pambèlu pààpa mwinshì mwà bikùtùkùtù byà micì yà mùriers, ne mwena lukunà munkaci mwà kujuukuluka. Dìbà dyà mùshindù kaayi dìvwàci ne cyà kwikala bwà Davidi's wè! Ndìbà kaayi's bwèndè yèyè uvwa mudyàdije mwaba awu awu! Yèyè kàvwa mumanyè mwà kutentemuka to, kàvwa

mumanyè kwà kuyiila to, bwalu ùvwa mumanyè ne bàvwa bamutàmbe ku búngi. Kàdi, dyàkàmwè, kuumvwayè mutooyi wà Cipeepèlè cìpicila ku nsongo yà tuumicì atu. Kumanyayè ne Nzambì ùvwa ùya kumpalà kwèndè, ki kuyayè ku mvità. Ndi ngumvwa cintu cyà mùshindù awu dilòlò edi, paanyimà pàà Diyisha dyà makèlèlè dilòlò, ndi nsanganyiibwa mu dîbà dyà ditàmbe kwikala dyà mîdimà dînkaadiku kacya ncîyi mwanji kukungamangana naadi kacya bândela to. Ndi ndyùm vwa bu Yeshàayi mu ntempèlù paanyimà pàà mumàne kumòna banjèlo abu, mémè ndi muntu wa mishikù mibiipè, ne musòmbèle munkaci mwà bantu bàà mishikù mibiipè. Kàdi tèèlejàayi, ndi—ndi. . . ndi ne cyà kutwilangana naaci mùshindù kampàndà, nènku, cintu cimwèpelè, ndi mwindile ànu bwà kuumvwa cipeepèlè cicolè aci cìpicila mu tuumicì twà mùriers, bwà kuya katwilangana ne mwena lukunà kwònsò kùdiye aku. Nzambì àtukwàcishèku bwà kucyènza.

³⁵ Nènku ndi ngeela meeji ne nkushàale kasunsa kamwè bwà dîbà dikùmi ne ibìdi jaajaaja kukùmbanadi. Nènku cidimu cyà 1962 ne byàci byònsò bìdi bipite abi, tubilekèlaayi biikalè bipite.

³⁶ Tùjuukilàayi kuulu mpindyewu, muntu ne muntu yònsò wà kutùdi. Ditembangana dyà makàndà ki kumònanganadi eku. Yònsò wa kunùdi. . . Pòlò wàkamba ne: “Tupwà mwoyi bintu bikàadi bipite,” bilèmà byètù byònsò byà cidimu cishàale: “Ndi nkolesha mutàngile ku cimanyinu cyà dibìikila ditùmbùke.” Bilèmà byànyi byònsò bìndi mwenzè mu bidimu byònsò ebi, bimfwilèku luse. Nzambì, mfwilèku luse. Èkèleeziyà, mfwilaayikù luse. Ne mudimu wa bwambi wùndi—wùndi mupangile naawù awu, mùndi ndyùm vwa; Nzambì, cimfwilèku luse. Èkèleeziyà, mfwilaayikù luse bwà bilèmà byànyi. Nènku nènkoleshè mutàngile ku cimanyinu cyà dibìikila ditùmbùke mu Kilistò Yesù. Cidì màalabà mulamè nànsha ciikàle cinyi, ncyèna mumanyè to, kàdi ndi mumanyè Ewu udi mulamè cidimu cyà 1963.

³⁷ Twèlàayi byanza byètù muulu kùdi Nzambì mpindyewu ne túsambilàayi mu mùshindù wètù twètù wà sungasunga, patùdi twenza ditonda dyètù apa, ne tulòmba Nzambì bwà àtukwàcishèku mu cidimu cidì cilwa kumpalà eci.

³⁸ Taatù wa mu Dyulu, patùdi biimàne mwaba ewu, pàdi meeji àbùngi munkaci mwà kufwà mu myoyi yètù apa, ne bwà bilèmà byà cidimu cishàale ebi, ne patùdi tusemena ku lufù lwà cidimu cyà 62 ne dilediibwa dyà cidimu cyà 63 apa, Éyi Nzambì, twikalèku beelè cidya cimwè kuulu ku cibàndilu, too ne patwikalà mwà kumòna Yesù ne ndongamu Wendè. Swàku bwà bantu bònsò kaaba aka, Mukalenge, mu disambila, pàdi cidimu cyà kale munkaci mwà kufwà apa, ne dilediibwa dipyadìpyà dyà cidimu cipyacìpyà dibwela, mpèkaatù ne bupidyà byà muntu mukùlukulu bìfwèkù mu mwoyi wètù, ne Dilediibwa dipyadìpyà dibwelèku ne cidimu cyà 1963, bu Cipeepèlè cicolè, cyà

civuma, cìdi cifwànyinekù kuuja bumùntù bwètù ne kutùvwija bifukiiwbwà bipyabipyà mu Kilistò.

³⁹ Tùvwijèku basadidi bakùmbànàngàne. Tùfwilèku luse ku bikààdi bipite. Bèleshàku matùkù ètù àcivwawwà. Tùlombòlèku, Eyi Mukalenge Nzambì, ne cyanza Cyèbè cyà bukolè, Yèhowàh. Bèleshàku bambi aba. Bèleshàku beena kwitabuuja bônso, beenyi bônso. Ikàlàku neetù, Mukalenge. Tudi basadidi Bèèbè ne tudi tudifila mu kabujimà kŪdi bwà cidimu cyà 1963, bwà bukolè bwà Nyumà Webè bwàmònakù mwà kutàmba kwikala ne bukòòkeshi mu nsòmbelu wetù ne mu bumùntù bwètù. Tùkwàcishèku, Nzambì. Tùfwilèku luse ne tùkwàcishèku, mmutùdi tulòmba. Juulàku balùmè bàà bukolè! Juulàku balwanganyi bàà mvità bàà bukolè bàà Diitabuuja! Kàngulàku cidimu eci, Mukalenge, Manà masokoka awu, Lubwebwe lwà mwinshì mwà lubwebwe alu, bwà twamònakù ndongamu wa Nzambì. Tèekakù lusongo pà bipaapu byà misàkà byà nsòmbelu wetù, Mukalenge; tèekakù Dibwe dyà mùsongà, Kilistò Yesù, pa muntu ne muntu yònsò. Mabènesha Èndè manènè malenga, a cijila awu ikalèku pambidi pèètù bônso. Kapyà kàà Nyumà Mwimpè kàlwekù pambidi pèètù. Bukolè bwà dibiiikà dyà ku lufù bùmweneshiibwèku. Nzambì, mùshindù mwinè wutùdi tuKusàkidila, dilòòlò edi's. Twètù tudi Bèèbè. Tudi tudifila Kùdi mu kaabujimà, Mukalenge.

⁴⁰ Pàndi nya dyàmwàmwa apa, ncìyi mumanyè ne mpenyi anyi mbishi, anyi cingenzà to, ndi mukweyemena Wèwè, Nzambì wa Bukolè bwònsò, bwà ne Wèwè ngwàndombola, mèmè musadidi Webè udi ncìyi ditèekela meeji ewu, bwà ngàngaciibwakù ku mudimu bwà buneemè ne butùmbì bwà Wa Bukolè bwònsò. Enzàku nàнку, Taatù.

⁴¹ Akìdilaku masambila ètù. Bèleshaku diditácisha dyètù. Ondòpàku babèèdi ne bàdi mu ntàtu, yònsò ne yà nyumà ne yà mubidi. Ne tùvwijèku basadidi Bèèbè. Twètù tudi diima, Wèwè udi Mufwimbi. Tùfwimbèku, muntu ne muntu, mu mùshindù Wèbè Sungasunga, bwà twamònakù mwà kukùmbanangana ne Kilistò Yesù, bu cidimba cyà Mubidi Wèndè. Bwalu tudi tulòmba nùнку mu Dìnà dyà Yesù, ne bwà bwalu Bwèndè ne bwà bwalu bwà Èvanjeeliyò. Amen ne amen.

[Mwanèètù wa balùme kampàndà ùdi wakula mu mwakulu mukwàbò. Mukwàbò mwanèètù wa balùme ùdi ùfila dyandamuna—Muf.]

⁴² Twasàkidila, Taatù Nzambì. Tudi tuKwela twasàkidila bwà dikànkamika dyà Cidimu Cipyacipyà edi didi ditùpàtula ne ditèkemena ne busàmbì bwà kumanya ne ku dyambila dyà bantu mēyi aa bàvwà kabàyi bamanyè ne, Mukenji mmulelèlè, ne Wèwè udi utùlòmba bwà twètù kuWùtwa nyama ku mikòlò. Netwènzè cyònsò citùdikù pèètù bamanyè mwà kwenza aci, Mukalenge, bwa kuKutwà Wèwè ne Dìyi Dyèbè nyama ku mikòlò.

43 Twăkidilèku mu Dîna dyà Ewu Utu mutùlongèshe bônso ne bivwa bikèngela bwà twètù kusambila mùshindù ewu, [Mwanèètù Branham ne disangisha bàdi bàsambila ne cyàpàmwè—Muf.]: “Taatu wetù Udi mu Dyulu, Dîna Dyèbè dîjidiibwè. Bukalenge Bwèbè bùlwe. Diswa dyèbè dyènjiibwè pa buloba, bu mùdidi dyènjiibwa mu Dyulu. Ûtùpè leelù ewu dyâmpà dyètù dyà bwàcyàbwàcyà. Ne tûfwilèku luse ku matomboka ètù, mutùdi pèètù tufwila aba bàdi bàtwènzèlè matomboka luse. Ne kùtùfikishiku mu diteeciibwa to, kàdi ùtùsùngilèku ku bubì; bwalu Bukalenge m’Bwèbè Wèwè, ne bukolè, ne butùmbi, kashidi. Amen.”

44 Mukalenge ànùbènèshèku ne ànùlamè. Kàdi aba mpindyewu bàdi ne cyà kuya ku mbànzà yàbò. . . Mpindyewu tukàadi tusunsa tùtaanu paanyimà, tukàadi tusunsa tùtaanu mu cidimu cyà 63. Mpindyewu Nzambi ànùbènèshè. Nènku—nènku nwènù bàdi baswè kushàala bwà mèèsà à Mukalenge, bìdi ànu bitùsànkisha bwà nwènù kushàala, netwikalè ne disànkà dyà kwikala neenù. Kî mmèèsà à Mukalenga à kaàyi a bantu bônso to, ngàà mwena kwitabuuja yônso udi mu bwobùmwe ne Kilistò. Bidi bitùsànkisha bwà wèwè kushàala ne kudyà mèèsà à Mukalenge pàmwè neetù. Ne citùdi twenzela cyòci eci mbwalu eci ncintu cyà kumpàlà, tudi tubanga lwendu kampànda. Nènku Izalèlèlè, kumpàlà kwà kwasabò lwendu lwàbò, bàakashebeya mwànà wa mùkòòkò ne kudyàbo bisoosà byà bululu, e kwasabò lwendu lwàbò. Ki mèmè kudyàmbidila ne: “Mùshindù mwìnè wùdibi bikùmbànàngàne ne cyòci eci dilòlòlò edì’s wè!” Mwànà wa mùkòòkò wàshebèyibù, Wàlongòlòdìibù, difesto, ne tudi mundankùlù. Ki dîbà divwabo baàdya, nudi bamanyè’s, mundankùlù. Pa nàнку tuàdyayi dîbà adi. Nwènù bàdi baswè kushàala neetù ne kudilongolola bwà lwendu lùlwalwà, lùdi lùsanganyibwà kumpàlà eku, netwikalè ne disànkà dyà kwikala neenù. Nzambi ànùbènèshè.

45 Ne nwènù bàdi ne cyà kuya mpindyewu abu, nudi mwà kwalukila ku mbànzà yènù, ne Nzambi ikalè neenù too ne patwàtwilanganà neenù cyàkàbidi. Amen. Nwènù bakwàbo nudi mwà kusòmbaayi ne pashiishè netùbangè mèèsà à Mukalenge. Mwanèètù wa bakàji neenzè. . . Èyo, mukalenge.

Too ne patwàsangilà! too ne patwàsangilà!
 Too ne patwàsangilà ku makàsà a Yesù; (Too ne
 patwàsangilà!)
 Too ne patwàsangilà! too ne patwàsangilà!
 Nzambi ikalè neenù too ne patwàsangilà
 cyàkàbidi!

46 Tùwimbàayi cyàkàbidi patùcidi bindile apa, nudi bamanyè’s, bwà aba bìikalà mwà kupàtuka kuya. Tudi bafwànyine kushàala bapùwe, ne pashiishe eci ncintu cyà kaciyi cyà tuseku to. Nèmbalèku cintu kampànda mu Mifundù emu mu katanci

kakesè cyanààna, cidi cimpè cyà menemene. Nènku mpindyewu tùwímbàayi cyàkàbìdì.

Too ne patwàsangilà! Too ne . . .

Tùlabulanganàayi ànu ku cyanza ne muntu kampànda. Kwókò cintu cibì mu nsòmbelu webè, muntu ùdì mwenzèle bibì awu yèyè kaaba aka, ndà kùdiye mpindyewu ùkacilongòlòle nendè.

Too ne patwàsangilà! too ne patwàsangilà!
Nzambi . . .

Mwimbi wa cisanji cyà pyànò ùdikù mwà kulwa ku pyànò anyi, bu yèyè mwà kuswa?

. . .neenù too ne patwàsangilà cyàkàbìdì!

Too ne . . .

⁴⁷ [Mwanèètù Neville ùdì wàmba ne: “Nzambi àkubènèshè, Mwanèètù Branham.”—Muf.] Ndi ndàmbulà byònsò ebi mu byanza byèbè, Mwanèètù Neville. [“Mukalenge àkubènèshè. Ndi ngiitabuuja . . .? . . .”] . . .? . . .

Too ne patwàsangilà!
Nzambi ìkalè neenù too ne patwàsangilà
cyàkàbìdì!

Nzambi àkubènèshè, mwanèètù wa balùme.

Ùdì ùkukùba,
Ùdì ùkukùba;
Pa muunyà anyi mu malèjì,
Ùdì ùkukùba.

Tùwímbàayi cyàkàbìdì.

Ùdì ùkukùba,
Ùdì ùkukùba;
Pa muunyà anyi mu dilèjì,
Ùdì ùkukùba.

⁴⁸ Abi kî mbilenga anyi? Tùwímbàayi cyàkàbìdì pàdìbo munkaci mwà kudituuja apu.

Ùdì . . .

Bwitàayi ànu kwísù cyanààna.

. . .ùkukùba,
Ùdì ùkukùba;
Pa muunyà anyi mu dilèjì,
Ùdì ùkukùba.

⁴⁹ Taatù wà mu Dyulu, tudi ne disànkà dyàbúngì bu mutùdì basangàne ne aci ncilelèlè, mu mèbà ètù a bwalu bukolè anyi pa muunyà, kacya Yèyè kàtukù ùtùshiyà anyi ùtùlekela nànsha. Tudi ne disànkà dyàbúngì bwà citùdì naaci, dyeyemena dyètù kadiyì diibakila pa cingà cintu to ànu pa Mashì ne bwakàne bwà Yesù. Tudi tweyemena, Mukalenge, kî mmu luumu lwà

pa buloba ebu to. Tudi tweyemena ne, katwèna tudidînga kweyemena cipidî citâmbè kunwàngana, kâdi mu kaabujimâ tudî tushîndameena pa Dîná dyâ Yesù. Mùshîndù mwinè wutùdî tuKusàkidîla's, Taatù.

⁵⁰ Mpîndyewu tukàadi pabwîpî ne kubwela mu cimwè cyâ ku—cimwè cyâ ku bîntu bîkesè byâ mu mubidî by'Ûdî mutùshîile. Cimwè cyâ ku byôbî cîvwa ndibâtiiza, cikwâbo cîvwa mmèèsâ à Mukalenge, ne cilondèlèlè cîvwa ndyoweshangana dyâ mâyi ku makàsâ. Èyi Nzambî, tudî tubwelamù ànu kakùyî tuseku to, bamanyè ne Mwânâ wa mùkòòkò ewu m'Mwânâ wa mùkòòkò wâ paasàkâ. Lwendu lu—lunènè lwâ mu cipèèlà lùvwa ànu lùsanganyîbwa kumpâlâ kwâ bânâ. Mashî àvwa ne cyâ kulaabiibwa dyâmbedi ku mùnòkò wâ ciibi, kumpâlâ kwâ mwânâ wa mùkòòkò wâ paasàkâ kwangaciibwayè.

⁵¹ Nzambî, kenkètâku myoyi yètù mpîndyewu. Mashî àdîpù anyî, Mukalenge? Wôwò kaâyîpù to, tudî tulòmba bwâ—bwâ Ùâlâàbèku ànu mpîndyewu mene, umusha mpèkaatù yètù ne uyîbwîkîla, nènkù neyîshiyanganè neetù, Mukalenge, mpèkaatù yâ buloba ebu, bwâ twamòna mwâ kwîkala bàâ cijîla ne bakùmbàne bwâ Taatù wetù mpîndyewu patùdî tulwa bwâ kwangata mu—mubidî ne Mashî a Mwânâ wetù wa mùkòòkò meela panshî, Mwânâ wa Nzambî, Musungidî wetù apa. Kenkètâku myoyi yètù patùdî tubala apa, Taatù, ne pashîshè tùvwîjèku Bèbè Sungasunga. Bwalu tudî tulòmba nùnkù mu Dîná dyâ Mwânâ wa mùkòòkò, Yesù Kilistò. Amen.

⁵² Mu Mukàndâ wâ—wâ Kolintò, nshapîtâ wa 11, ndî njînga kubala ndambù wa mvensâ, ndî mbala cyôcî eci kubangîla ku mvensâ wa 23. Pòlò ngudi wakula ne èkèleeziyâ wa beena Kolintò.

Bwalu ndî mupetè kùdî Mukalenge cîndî pàanyi munùtwàdîle, Bwâ ne Mukalenge Yesù bufùkù bumwèbumwè . . .bwâkamutungîlabo abu wâkangata dyâmpâ:

Nè pàakamanâye kusàkidîla, wâkadîcîbula, ne wâkamba ne: Angâtaayi, ne nùdye: eci mmubidî wànyî, wùdî mucîbùdîibwe bwâ bwalu bwènù: nwîkalâayi nwenza nùnkù bwâ kumvùluka.

Byâ mwomùmwe kàbidî yèyè wâkangata lupànza, ne pàakamanâye kudyâ didyâ dyâ dilòòlò, wâkangata lupànza, kadi pàakamanâye kudyâ didyâ dyâ dilòòlò . . .

Mfwîlaayîkù luse. Lekèlaayi ncibalùlùlè.

Byâ mwomùmwe kàbidî yèyè wâkangata lupànza, ne pàakamanâye kudyâ didyâ dyâ dilòòlò, kwamba ne: Lupànza elu ncîpungidî cipyacipyâ mu mashî àanyi: ikâlaayi nwenza nùnkù bwâ kumvùluka, misangu yònsò yînwânwâ eci, bwâ kumvùluka.

Bwalu misangu yônsò yinwàdyà dyâmpà edi, ne yinwânwà lupànzà elu, nudi nuleeja patòòkè lufù lwà Mukalenge too ne pààlwàye.

Ki bwà cinyì ewu yônsò wàdyà dyâmpà edi, ne wânwà lupànzà lwà Mukalenge elu, kàyi mukùmbànyine to, neikalè mupùile kùdì mubidi ne mashi à Mukalenge.

Pa nàнку muntu àdikenkètè yéyè mwinè, nènku àshiiishè kudyà dyâmpà adi, ne ànwè lupànzà alu.

Bwalu ewu udi udyà ne ùnwa kàyi mukùmbànyine to, udi ùdyà ne ùnwa dipùila dyèndè yéyè mwinè, kàyi ùjingulula mubidi wà Mukalenge to.

Bwà bwalu ebu bààbùngì bàdi bàsaama ne batekètè munkaci mwènù, . . . bààbùngì mbalààle tulù.

Bwalu bu twètù mwà kudilumbulwisha twètù biinë, katùwwa ne cyà kulumbulwishiiibwa to.

Kàdi patùdì tulumbulwishiiibwa, tudi tunyookiiibwa kùdì Mukalenge, bwà katùlu kupùshiiibwa pamwè ne bàà pa buloba nànsha.

Ki bwà cinyì, bàna bèètù, panùdì nudisangisha bwà kudyà, indilànganaayi muntu ne mukwèndè.

Nènku muntu yéyè ne nzala, àdiilè kwèndè kumbèlu; bwà nwènù kanùdisangishi bwà dipùshiiibwa to. Nènku bwà bidì bishààla nèmbitèèkè mu bulongàme pàngààlwà.

⁵³ Pàndi ngeela meeji ku cyòci eci, cikondo cyà citàmbe kwikala cyà kaciyi tuseku to! Bààkafùnda kàbidì ne pààkafidiibwà dyàmbedi mèèsà à Mukalenge aa, ne dyoweshangana dyà màyi ku makàsà. . . didi dikèngelà kutèeka ku luseke dilòòlò edi, bwalu katwèna ne màyi to. Màyi wònsò mmakànga, ne katùwwa nànsha ne nkumba dilòòlò edi to, bwalu bìwwa bikèngela ànu bwà bóbò kucitwàngaja ne mwàbò mwònsò, bwà twètù kwenza disangisha edi dilòòlò edi. Kàdi netwènzè ànu mùvwàbo benzè amu, bambè ne, ngeela meeji ne Luukà ngwákacyambà, ne: “Bààkimba musambu e kupàtukabò kuya.” Kàdi nudi bamanyè cidì bwalu ebu bùleeja anyi? Nudi bamanyè’s, ku cibangidilu, pààkatùmabò dīyī edi dyàmbedi mu Izalèlèlà, mu Èjiipitù mwàmwa, bàvwa mu njila batàngile ku buloba bulaya. Nènku ki mutùdì tudyùmvwà dilòòlò edi, bwà ne tudi mu njila batàngile ku Buloba Bulaya. Nènku lwendu ludi lùsanganyiibwa kumpàlà kwètù.

⁵⁴ Kàdi bàvwa ne cimanyinu, cyà ne pàvwà mwanjèlo wa lufù mupicilemu, cyà ne kùvwà ne cyà kwikala mashi ku ciibi, cyanàànà mwân’-à-butè wa balùme anyi mwân’-à-butè uvwa ùfwa mu nzùbu amu. Meeji àvwa ne, ne dyumvwija dilelèlèlè dīvwa ne, dyàmbedi kulààba mashi. Nuvwakù bamòne mùdì Pòlò mucitèèke kaaba aka anyi? “Muntu yéyè mudyé kàyi

mukumbànyine to, ùdi ùdya ne ùnwa dipiila dyèndè yéyè mwìnè, kàyi ùjingulula mubidi wà Mukalenge to,” cidi cyumvwija cintu cimwècimwè aci ne, lufù, lufù lwà nyumà, lùlwa pa muntu uvwa mwà kulwa mwabanyanganyi wa didyà dyà dilòlò dyà Mukalenge kàyi mukumbànyine awu. Aci ncifwànyine kwikala, kupàtuka kukanwà maalà ne kwenza maalu à lukutukutu, ne kwikala ne nsòmbelu mufwànàngàne ne wa bàà pa buloba, kàdi kulwa ku mèèsà a Mukalenge. Kabivwa bikengela bwà twètù kwenza nàнку to. Mpindiyewu tùkezulàayi myoyi yètù ne byanza byètù ku . . . ne meeji ètù ku ngeelèlù mubi wa meeji, bwà twamòna mwà kulwa ku mèèsà à Mukalenge, biikàle ne kaneemu ne bàà cijila, bu mutùdi bamanyè ne tudi tulamakana twètù biinè ne Mulàmbù wètù, Kilistò Yesù, Udi lupàndù lwètù sungasunga awu.

⁵⁵ Nènku mpindiyewu, dilòlò edi, mùshindù wutùdi twenza cyòci eci, ngwà ne umwe wa ku bakùlù ùdi wimane mwab’ewu, Mwanèètù Zabel. Nènku ndi ngeela meeji, Mwanèètù Zabel, dilòlò edi ne, bu wèwè mwà kubiiikidila dyàmbedi pa cibumbà cyà ku cyambilu, bwà bantu aba bàamonè mwà kufumina pa cibumba cyà ku cyambilu eku ne kwenza mulongo wènù wà kumpalà awu apa, bu nwènù mwà kuswà. Mpindiyewu, Mwanèètù Zabel neànùlombòlè, mu katanci kakesè, patùkaadi ànu babènèsha mèèsà à Mukalenge.

⁵⁶ Dyàmpà dyà kosher edi, ndyenza kùdi mwena Kilistò. Ndyàmpà didi kadiyi dyela lwevènyà to. Nènku bu nwènù mwà kudimòna, panùdi nudyèla mukana, ndyumàkàne bikolè, bwà kwikaladi dìbi mukana. Ndyèlè minyèngù ne dicibùlùke, disopakaja, aci cidi cyumvwija mubidi mucibùlùke muzaajiibwe wà Mukalenge wètù Yesù. Kaa, pàndi mene ngeelakù meeji, mwoyi wànyi’s wùdi wàmba kwimana’s wè! Pàndi ngeela meeji ne Yéyè wàkasopakajiibwa ne kuzaajiibwa ne kutuuciibwa, Mwànà wa Nzambi uvwa kàyi mwenzè bwalu awu! Nudi bamanyè bwà cinyi Wàkenza nàнку anyi? Mbwalu mvwa mupiile. Ki Yéyè kushààla mèmè, ngènzàmpèkàatù, bwà ku Mulàmbù Wèndè ndwe mufwànàngàne Nèndè, mwànà wa balùme wa Nzambi. Mulàmbù kaayipu’s wè!

Twinyikàayi mitù yètù.

⁵⁷ Nzambi mutàmbe Cijila, pàndi mukwàte mu kaadilongò kakesè kàà cyamù aka dilòlò edi, dyàmpà edi didi dilèèja mubidi mucibùdiibwè, musopakaja, muzaajiibwè, mutuuciibwe wà Mukalenge wètù, mwàkeela mupròfetà awu lubilà ne: “Wàkatàpiibwa mpùtà bwà dishipa dyètù dyà mikenji, muzaajiibwe bwà bubi bwètù, dinyooka dyà ditalala dyètù dyàkapòna pambidi Pèndè, ne ku mibùndàbùndà Yèndè twàkondopiibwa.” Kaa, mùshindù mene wutùdi tuvùluka cyòci aci’s, Mukalenge! Pàndi ndiswikila ku Mulàmbù awu dilòlò edi apa, ne batèèleji aba mwomùmwè, Mukalenge, ku Mulàmbù ewu, swàku bwà tùvulukè Mukalenge wètù, lufù Lwèndè ne

dituuciibwa Dyèndè dyà mfimbù, ne byònsò byàkápìcilàYe bwètù twètù abi, patùdi twela dyàmpà edi mukana mwètù apa. Nzambì, tudi bantu bàdi kabàyi bakùmbànyine to. Katwèna baakànyine cintu cyà cijila bu nàнку to, pa nàнку swàku bwà cijila Cyèbè, Mukalenge, Bwikadi Bwèbè ne Mashi Èbè, bikezulèku myoyi yètù. Nènku patùdi tucyàkidila apa, kiipàcilà kàà mu meeji ètù kiikalèku dībà dyònsò kàà kuMusadila muunya ne bufùku, matùkù ètù ónsò a mwoyi. Mpindyewu jidilàku dyàmpà edi bwà mudimu wùdi mudìlongolwela. Tudi tulòmba mu Dìna dyà Yesù. Amen.

⁵⁸ Nènku ndi mukwàte eci mu byanza byànyì, bu makùmi àsàtù ne . . . bidimu bu makùmi àsàtù ne bisàtù byà mudimu wùndi musadile Mukalenge wanyì, ne ndi ndyùmvwà bundù. Kàdi ndi ngeela meeji ne, cìmvwà mufwànyine kwenza ncinyi bu ne mvwa ne mamata àbìdi a Mashi Èndè meena diinà makwàta mu cianza cyànyì dilòòlò edi? Mvwa mufwànyine kwenza naawù cinyi? Kàdi, nudi bamanyè's, ndi mupetè mu byanza byànyì dilòòlò edi, ku mèsù Kwèndè, cidi citàmbe bunènè, ncintu cisumba ku Mashi Èndè, Èkèleeziyà Wendè. Pa nàнку pàndi mukwàte eci apa, ne màyi à tumuma twà mvinyò etu, ndi ngeelaku meeji. Yèyè wàkamba ne: "Ncyàkunwà kàbìdi tumuma twà mvinyò to too ne pàngààtùnwà neenù tupyatùpyà mu Bukalenge bwà Taatù Wanyì." Pashiishè mònaayi ne paanyimà pàà mvità yà mpèkaatù mimanè kujika, cintu cyà kumpàlà citùdi twenza patùdi tudyata luseke lukwàbo lwàlwa nkwangata mèèsà a Mukalenge, didyà dyà dilòòlò dyà Mukalenge.

⁵⁹ Nènku twìnyikàayi mitu yètù mpindyewu patùdi tubènesha mvinyò ewu apa. Taatù wetù wa mu Dyulu, pàndi ngeela meeji, pàndi mukwàte mvinyò ewu udi uleeja Mashi à Yesù apa, mùshindù wùdibi ne kupìcila ku Mashi àdi àtuutà nkòkà awu mpèkaatù yànyì mmiyè. Myediibwe mu Mbù wa Cipwàmwòyi, bwà kayiyi mwà kuvùlukiibwakù kàbìdi to. Nènku ne Mashi aa, mwànà wa balùme uvwa upùnga ne lufù dìngà ditùkù mulààle kuntu kwàka mu lùpitaadi, kàdi Wèwè kunsungila. Èyi Nzambì, mùshindù mwine wùndi nKusàkidila's, Mukalenge. Ne pashiishè kumpèsha bujitu, ku Nyumà Mwimpè, bwà kulombola bantu ku Kàlvariyo ne kubàleeja njila wa dyalukidila Kumbèlu. Twasàkidila, Taatù. Nènku mpindyewu jidilàku mvinyò ewu bwà mudimu wùdi mumulolongolwela. Ne muntu yònsò udi mwabanyanganyi wà mùshingà ewu, dilòòlò edi, àpetèku dikàndà dyà nyumà ne dyà mubidi bwà lwendu lùdi lutèekiibwe kumpàlà eku. Bwalu tudi tulòmba nùnkù mu Dìna dyà Yesù. Amen.

[Bàdi bafila mèèsà à Mukalenge kùdi disangisha. Katùpà kàà mukàbà wà mèyi munda mutupù—Muf.]

⁶⁰ Bwà kwimana mwab'ewu ne kutàngila mèkù àbwela, ki mùshindù wikalàbi dimwè dyà ku matùkù adi panshì aa, ku dìkù ne ku dìkù, ku mulongo ne ku mulongo, ku cisumbu

ne ku cisumbu, ku umwè ku umwè. Patwàtwilamganà Nendè, neciikalè cikondo kaayi's wè, dîbà diikalà mwoyi wónsò wà buntu wùkaatùku pa buloba awu, wùtù muMwitàbùùje ne muMweyèmène awu, newùtwilanganè kwòkò aku mu Ditùkù adi. Kabyàkwikalakù bilenga bilayà anyi? [Disangisha dîdi dyamba ne: "Amen."—Muf.]

⁶¹ Bikèngela tùùmushè dyoweshangana dyà mâyi ku makàsà dilòòlò edi bwà dipanga dyà mâyi. Katwèna ne nkumba mikùmbàne mpindyewu mene to, nènku nebàyìlongòlòlè mu matùkù makesè emu, mutùdì batwishìibwe. Midimu yìdì yènda bîmpè, ne bàdì bakwàta mudimu lùkàsàlùkàsà mu tabernacle mupyàmùpya. Mu mùshìndù kampàndà ndi ngeela meeji ne mbikùmbànàngàne menemene bwà kudya mèèsà à Mukalenge mu ditùkù dyà nzànzànzà dyà cidimu nùnkù ewu, cikondo eci cyà ditùkù.

⁶² Mpindyewu, nwènù bàà pambèlù pàà cimenga, nwèndeshaayikù màshinyì mààlabà ne mbàbì pa nwènù kwalukila mu mèènù apu. Nzambi ikalèku neenù. Ne nwènù bàà mwètù muneemu, bàà pabwìpì apa, Nzambi ikalèku neenù ne ànùkwàcishèku. Nènku mpindyewu, bu Mukalenge mwà kwanyisha, ne bidì bikèngela bwà mémè kuumuka bwà disangisha dîdi dilondà edi mu Arizona, ne dîbà adi bu Nzambi mwà kwanyisha, nèngààlukilè bwa kwikalè neenù cyàkàbidì bwà *Bitampì Mwandamutekète*, ànu mùmwà mulayè amu. Ncyà bushùwà ne ndi dijinga ne masambila enu. Ndi nnùjinga bibì be, pa nànkù kanùpukù mwoyi bwà kunsambidila to. Nènku maalu ônsò èndèkù bilenga bwènù nwènù. Ne ndi ngaanyisha bushùwà dilwa dyènù dyà mu disangisha emu ne mùshìndù wunùdì batèèlèje bîmwè mwambè mu Èvànjeeliyò. Ndi ngiitabuuja ne tudì twenza dishintuluka mpindyewu. Nènku mémè ndi, ndi nnùsàkidila bwà musàngeelu wènù.

⁶³ Ne bààbùngì bàà kunùdì bàdì bèndesha màshinyì ntàntà wa maakilòmèètà ne maakilòmèètà bwà kulwa kutèèleja muntu mupwekèle bu mémè mwinè ewu mùndì nteeta bwà kutwàla Dìyì dyà Nzambi. Ndi mutwishìibwe ne civwa ncintu citàmbe aci cinùvwà balwè kutèèleja pa kunguumusha mémè, bwalu ncyènakù ne cintu ciinè címvwà mwà kuleeja ku bantu to. Ncyèna mulongè kàlaasà to, nciyikù ne bumùntù bwìnè, nciyikù bwànsongo mémè ewu. Dîbà adi pàndì mmòna bantu bwènàndesha màshinyì ntàntà yà kilomèètà nkàmà ne nkàmà, ne biimna ne bàshààla bindile kaaba aka, pa dîbà ibidì wa dindà, kacivwa bwà cintu nànsha cimwè címvwà naaci to. N'Kilistò. Ndi ne disànkà dyàbùngì munùdì baMunangè. Ne mémè pàanyi, ndi muMunangè. Ne bònsò pàmwè tudì baMunangè. Nènku bu mutùdì baMunangè, katwàdyàkutàpulukakwèè. Tudì mwà kutàpuluka kakesè pànwapa, pàcìdì bikondo bitùngunuka apa, kàdì netwikalè cyàkàbidì pàmwè. Ki citù kiipàcìlà kàanyi ànu bwà kuteeta kulombola bantu ku mwinè mwaba awu.

⁶⁴ Nènku mpindyewu mu kutwàdija cidimu cipyacìpyà, ndi muswè kunwàmbila, kî nnè: “Cidimu Cipyacìpyà cyà dyàkalenga” to, Ndi muswè nnwàmbilèku eci ne: “Nzambi ànùbènèshè.” Nènku Yèyè mwenzè aci, ki cyònsò cidi cinùkèngela bwà cidimu cìcilwalwà eci. Ne ndi mutwishìibwe ne Yèyè neenzè.

⁶⁵ Nènku ndi, ku ngàsà Wèndè, netùteetè cidimu cidi cìlwa eci, Yèyè mundamè, ne munùlamè, ku ngàsà Wèndè ndi ntèkemena ne nèngìikalè mpaasàtà mwîmpè cidimu cìlwalwà kutàmba mùmvwà cidimu eci, ntèkemena ne nèngìikalè musadidi mutàmbe bwîmpè wa Kilistò. Nenteetè ne mwànyì mwònsò bwà kwikala ne nsòmbelu mutàmbe kwikale wa ndòndò, wa lulamatu lwàbùngi, bwà kutwàla Mukenji ànu mùdìYe ùmpèèsha amu, nènntwàdìlèWu ne mwànyì mwònsò mùndì naamù amu, ncìyi ndaminyina cintu nànsha cìmwè cidiYe muswè bwà mèmè kunùpèèsha to. Nèngènzè cyònsò cìndì pàànyì mumanyè aci. Ne ndi mumanyè ne nudi nudyùmvwa ànu mùshindù wùmfwèwùmfwè awu. Nudi—nudi nudyùmvwa bu ne twètù bònsò tudi baswè kukwàcila mudimu pàmwè mpindyewu, bwalu makènkè à dilòlò àdi ènda àbwicidila bulelèlè, ne dîbà dikaadi dyènda dîbwela kule ne kule. Buloba bùdi bùkwàta mashika, tudi bamanyè nànkù, mu ngaakwìlu wa nyumà, èkèleeziyà udi wènda ùkwàcika mashika ne ditàbuluja ndijikè. Katwèna bamanyè cidi cìlondà to, kàdi netwèyemenè Nzambi bwà cyòci aci, ní ncinyi cyònsò cìdiku aci. Ne mpindyewu patùdi misangu mikwàbò . . .

⁶⁶ Ndi muswè bwà nùvulukè ne tabernacle ewu ùdi ne umwe wa ku bampaasàtà bàà batàmbe bunène menemene bàdiku pa buloba, Mwanèètù Orman Neville, muntu wa difwàna dyà Nzambi, muntu mwîmpè. Nènku dîbà dîndì ncìyipù to, Mwanèètù Neville mmwambùle bujiti bwònsò, ànu bu ne mmèmè mkwikala mwab’ewu. Balubuludi, balami, ne bakwàbo, bikèngela bàshàalè mu midimu yàbò ànu mudibo benza amu. Nènku eci ki cyètù ciimamwèndè wa bukalenge. Ewu ki mwaba wutùdi—wutùdi—wutùdi biimànyine, apa mene. Billy Paul kàakwikala naanyi kuntwaku to, anu bwà disangisha, nealukilè mùneemu. Midimu yònsò yìdi yènzekela ànu mwaba ewu mene bu pa ciibidilu. Nyààya ànu kuntwaku cyanààna, kî mbwena kwamba ne ndi nnùshìya to. Ndi ànu nya cyanààna, nudi bùmvwè’s, cidi ànu cìkèènà-kumòna cyanààna. Ncyèna mumanyè cìdici cyùmvwija to. Ndi mutwishìibwe ne ngiitabuuja bulelèlè ne necìikalè bwà dilengejiibwa dyà Èkèleeziyà mujimà. Ne ndi mumanyè ne nebitàmbe kwikala bìmpè bwètù bwònsò twètù tulonda bulombodi bwà Mukalenge. Ki cyònsò citùdi bamanyè mwà kwenza. Ki mbipeepèle bwànyì mèmè to. Ndi mvùluka musangu kampànda kumpàla kwàkakèngelabì bwà mèmè kuumuka mu èkèleeziyà emu. Bamwè bàà ku beana kale mbavùlùke aci,

mùshindù mwinè wûmvwà nciyi mwà kuumuka's wè! Ntu munangè bantu.

67 Pâncivwà mwânà mukesè kabàvwakù bannangè to, muntu nànsha umwe kàvwakù ùncyùka to pâncivwà mwânà, nènku mèmè, pângākajandùlâ ne muntu kampànda munnangè, mvwa—mvwa ndyâmbidila ne: “ndi muswè kufwà bwèndè yèyè.” Nènku mpindyewu, bwalu muntu kampànda mmukunangè, muntu kampànda udi ùcyùka. Mvwa mbànda musangu kampànda ku dikunji nènku ndòbo wanyì kufinunukayè pa dikunji dyà kale dyà mucì wà cèdre awu, ne dijità diikàle kuulu menemene, ki mèmè kudituuta ne kalonda kàanyi ne kukùdimuka, kudishinda mu ntàntà wa mètres anaayi ne citùpà e kulàadila pa dibòko. Inâbànzà kampànda kwelayè lubilâ lukole, e kwenzayè bu wadituutù byanza pa cyâdi mùshindù ewu. Ntu misangu yònsò muswè inâbànzà awu, yèyè wākacyùka. Úvwakù yèyè muntu wākacyuka. Nènku mvwa misangu yònsò ànu ndyambidila ne: “muntu kanà yònsò wākancyùka awu, ndi mumunangè.”

68 Kùkaadi cikondo kampanda mvwà mu ville, ngenda ngeela meeji ku matùkù àvwàku kale wàwa, ne bìdi Nzambi mungenzèle, nènku ndi cyà bushùwà ncyányisha. Ne ndi nzwèla twasàkidila bwà dinanga ne bwobùmwè bwènu. Ne ncyenàkù mwa kuteeta kunùlombola bibi to. Neciikalè misangu yònsò ànu njila mululàme, ku dyànyì pàànyì dimanya. Ne ngangàtaayi bu ntèmù, kacya ncitukù mwambè cintu bwànyì mèmè mwinè to, citu misangu yònsò ànu Yesù Kilistò. Nwamònu anyi? Nwamònu anyi? Ntu muteetè bwà kushààla ànu pabwìpì mu Dìyi Dyèndè ne mwànyì mwònsò, bwà kunùlombola ne kunùludika ku mwaba ewu.

69 Nènku ndi nnùfila mpindyewu mu byanza byà Mwanèètù Neville, dyàmbedi mu byanza byà Nzambi, ne pashiishè mu bukùbi bwà Mwanèètù Neville, bwà kudiisha èkèleeziyà ne kutàbaleela bumpyànyì ebu too ne pandi mwà kwenza masangisha aa ne kwalukila cyàkàbìdi kunùdi. Mutwishibwe dîba adi ne mvwa mwà kunùtwàdila dibuulula dinènè dyà kùdi Nzambi, dyàtùpishà mwoyi ne mwoyi wònsò ne disànka ne kutùmbisha Èkèleeziyà wa Nzambi.

70 Tutu pa ciibidilu tudya mèèsà à Mukalenge. Ncyena muswè kwamba byàbùngì to, nudi bamanyè mùndi ndyùmvwa. Nènku ndi ngeela meeji ne musambu wùvwà wùkèngela bwà twètù kwimba mpindyewu mene awu: *Diitabuuja Dyànyì Nditàngile Kùdi, Wèwè Mwânà Wa Mùkòòkò Wà Kàlvariyò*. Nènku patùdi twimanyina kuulu tuwimba apa, tùlabulanganàayi ku cyanza muntu ne mukwèndè, twamba ne “Nzambi àkubènèshè.”

Diitabuuja dyànyì nditàngile Kùdi,

71 Àkubènèshè, mwanèètù wa balùme. Nzambi àkubènèshè, mwanèètù wa bakàji. Nzambi àkubènèshè, mwanèètù wa bakàji.

Musùngidi . . .

Nzambi àkubènèshè, mwanèètù wa balùme.

... wa kùdì Nzambi.

Mpindyewu...

...?...

...yònsò Webè!

Mpindyewu twèlàayi byanza muulu kùdìYè.

Diitabuuja dyànyì nditàngìle Kùdì,

Wèwè Mwànà wa mùkòòkò wa Kàlvariyò,

Musùngìdì wa kùdì Nzambi;

Mpindyewu ngumvwilèku pândì nsambila apa,

Umùshàku dipiilà dyànyì dyònsò,

Éyì anyìshàku bwà kuumukila ku leelù ewu

Mémè ngiikalè yònsò Webè!

⁷² “Too ne patwàsangilà!” Twìmbàayi *Too Ne Patwàsangilà*
Cyàkàbìdì. Bantu bònsò dísangàayi pamwè mpindyewu.

Too ne patwàsangilà! too ne patwàsangilà!

Too ne patwàsangilà ku makàsà a Yesù;

Too ne patwàsangilà!

...?...

...ikalè neenù too ne patwàsangilà cyàkàbìdì!


Too ne patwàsangilà! too ne patwàsangilà!

Too ne patwàsangilà ku makàsà a Yesù; (Too ne
patwàsangilà!)

Too ne patwàsangilà! too ne patwàsangilà!

Nzambi ikalè neenù too ne patwàsangilà
cyàkàbìdì!

Twìnyikààyaaku mitù yètù mpindyewu.

⁷³ Mwanèètù Neville, mona's, kwènàku muswè bwà
kutùtangalaja mu disambila anyì? Nzambi àkubènèshè. 

DITEMBANGANA DYÀ MAKOLÈ LUA62-1231

(The Contest)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu òmwè dilòlò, mu matùkù 31 à ngondo wa dikùmì ne mwibìdì, cidimu cyà 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org